

maximo periculo: ut scribis, stultissimus sis. Non arbitror, te ita sentire. Omnes enim tuos ad laudem impetus novi. Quòd si, ut scribis, ità sentis, non magis te, quām de te judicium reprehendo meum. Te adipiscendi magistratus levissimi, et divulgatissimi, si ità adipiscare, ut plerique, præ propera festinatio abducet à tantis laudibus, qui bus te omnes in cœlum jurè, et verè ferunt? Scilicet id agitur, utrūm hac petitione, an proxima prætor fias, non ut ità de repub. mereare, omni honore ut dignissimus judicere. Utrūm nescis, quām altè ascenderis; an pro nihilo id putas? si nescis, tibi ignosco: nos in culpa sumus. Sin intelligis, ulla tibi est prætura, vel officio, quod pauci, vel gloria, quām omnes sequuntur, dulcior? Hac de re et ego, et Calvisius, homo magni judicii, tui que amantissimus, te accusamus quotidiè: comitia tamen, quandò ex his pendes, quantum facere possumus, quod multis de causis reipub. arbitramur conducere, in Januarium mensem protrudimus. Vince igitur, et vale.

ARGUMENTUM.

Lepidum quasi molli brachio objurgat, quia summis honoribus à senatu ornatus, gratiarum agenda rum officium neglexerat. Tum, pacem inter Antonium, et bonos cives conciliare cupientem hortatur, ne se interponat.

M. T. C. M. Lepido S. D.

Quod mihi pro mea summa erga te benevolen-
tia magna curæ est, ut quām amplissima dignita-
te sis; molestè tuli, te senatui gratias non egiisse,

cum esses ab eo ordine ornatus summis honoribus. Pacis inter cives conciliandæ te cupidum esse, læ- tor. Pacem eam si à servitute se jungis, consules et reipu. et dignitati tuæ: sin ista pax perditum hominem in possessionem impotentissimi domina- tus restitutura est; hoc animo scito esse omnes sanos, ut mortem servituti anteponant. Itaque sa- pientiùs, meo quidèm judicio, facies, si te in is- tam pacificationem non interpones: quæ neque senatui, neque populo, neque cuiquam bono pro- batur. Sed hæc audies ex aliis, aut certior fies lit- teris. Tu pro tua prudentia, quid optimum factu sit, videbis.

ARGUMENTUM.

Dolet se non fuisse participem coniurationis in Cesarem, quia superstes Antonius non fuisse, qui pernicie reip. molitur: deinde suum libertatis recuperande studium declarat.

M. T. C. C. Trebonio S. D.

Quām vellem ad illas pulcherrimas epulas me id. Mart. invitasses! reliquarum nihil haberemus. At nunc cum his tantum negotii est, ut vestrum illud divinum in temp. beneficium nonnullam ha- beat querelam. Quòd verò à te, viro optimo, se- ductus est, tuoque beneficio adhuc vivit hæc pes- tis; interdùm, quod mihi vix fas est, tibi subiras- cor. Mihi enim negotiis plus reliquisti uni, quām præter me, omnibus. Ut enim primùm post Anto- nii foedissimum dijcessum senatus haberi libere potuit, ad illum animum meum reverti pristinum, quem tu cum cive acerimo, patre tuo, in ore, et amore semper habuisti. Nam, cum senatum ad

354

EPIST. AD PLANCUM.

xiii. Kal. Jan. tribuni pleb. vocavissent, deque alia re referrent: totam rem. sum complexus; egique acerrimè, senatumque jam languentem, et defessum, ad pristinam virtutem consuetudinemque revocavi, magis animi, quām ingenii viribus. Hic dies, meaque contentio, atquē actio spem pri- mūm populo Rom. attulit libertatis recuperandæ. Nec verò ipse postea tempus ullum intermisi de rep. non cogitandi solum, sed etiam agendi. Quod nisi res urbanas, actaque omnia ad te perferri arbitraret, ipse perscriberem; quamquām eram maxi- mis occupationibus impeditus. Sed illa cognosces ex aliis, à me pauca, et ea summatim. Habe- mus fortē senatum, consulares partim timidos, partim male sentientes. Magnum damnum factum est in Servio. L. Cæsar optimè sentit: sed, quod avunculus est, non acerimas dicit sententias. Consules egregii: præclarus D. Brutus: egregius puer Cæsar: de quo spero equidēm reliqua: hoc verò certum habeto, nisi ille veteranos celeriter conscripsisset, legionesque duæ de exercitu An- tonii ad ejus se auctoritatem contulissent, atquē is oppositus esset terror Antonio, nihil Antonium sceleris, nihil crudelitatis præteritum fuisse. Hæc tibi etsi audita esse arbitrabar, volui tamen notiora esse. Plura scribam, si plus otii habuero. Vale.

ARGUMENTUM.

*Scribit de suo studio erga salutem Ampii exulan-
tis, bonaque spem habere jubet.*

M. T. C. Ampio Balbo S. D.

De meo studio erga salutem, et incolumitatem

LIBER X.

355

tuam credo te cognosce ex litteris tuorum: qui- bus me cumulatissimè satisfecisse, certò scio. Nec iis concedo, quamquām sunt singulari in te bene- volentia, ut te salvum malint, quām ego. Illi mihi necesse est concedant, ut tibi plūs, quām ipsi hoc tempore prodesse possim. Quod quidēm nec destiti facere, nec desistam, et jam in maxima re feci, et fundamenta jeci salutis tuæ. Tu fac bono animo, magnoque sis, meque tibi nulla in re defu- turum esse cōfidas. Pridie Non. Quint. Vale.

ARGUMENTUM.

*Prælium, victoriaque de Antonio relata nun-
tiantur.*

Ser. Galba Ciceroni S. D.

Decimo septimo Kal. Maii, quo die Pansa in castris Hirtii erat futurus, cum quo eram, (nam ei obviam processeram millia passuum centum, quo matutiū veniret) Antonius legiones eduxit duas, secundam, quintam trigesimam, et cohō- tes prætorias duas, unam suam, alteram Silani, et evocatorum partem. Ita obviam venit nobis, quod nos quatuor legiones tironum habere solum arbi- trabatur. Sed noctu, quod tutiū venire in castra possemus, legionem Martiam, cui ego præesse solebam, et duas cohortes prætorias miserat Hirtius nobis. Cum equites Antonii apparuissent, conti- nere neque legio Martia, neque cohortes præto- riae potuerunt: quas sequi cœpimus coacti, quando eas retinere non poteramus. Antonius ad Fo- rum gallorum suas copias continebat, neque sci- ri volebat, se legiones habere: tantum equitatum

et levem armaturam ostendebat. Posteaquam vidit se invito legionem ire Pansa, sequi se duas legiones jussit tironum. Posteaquam angustias paludis, et silvarum transivimus, acies est instruuta à nobis duodecim cohortium. Nondū venient legiones duæ, cum repente Antonius in aciem suas copias de vico produxit, et sine mora concurrit. Primo ita pugnatum est, ut acrius non posset ex utraque parte pugnari. Sed dexterius cornu in quo ego eram cum Martiæ legionis cohortibus octo, impetu primo fugaverat legionem trigesimam quintam Antonii, ut amplius passus quingentos ultrâ aciem, quo loco steterat, processerit. Itaque cum equites nostrum cornu circuire vellent, recipere me cœpi, et levem armaturam opponere Maurorum equitibus, ne aversos nostros aggredierentur. Interim video me esse inter Antonianos, Antoniumque post me esse aliquantò. Repente equum immisi ad eam legionem tironum, quæ veniebat ex castris, scuto rejecto. Antoniani me insequi: nostri pila conjicere velle. Ita nescio quo fato sum servatus, quod cito sum à nostris cognitus. In ipsa Æmilia, ubi cohors Cæsarialis prætoria erat, diù pugnatum est. Cornu sinistri, quod erat infirmius, ubi Martiæ legionis duæ cohortes erant, et cohors prætoria, pedem referre cœperunt, quod ab equitatu circumabantur, quo vel plurimum valet Antonius. Cum omnes se recepissent nostri ordines, recipere me novissimus cœpi ad castra. Antonius tamquam vitor, castra putavit se posse capere. Quod cum venit, complures ibi amisit, nec egit quidquam. Audit a re, Hirtius cum cohortibus viginti veteranis

redeunti Antonio in sua castra occurrit, copiasque omnes ejus delevit, fugavitque eodem loco, ubi erat pugnatum, ad forum gallorum. Antonius cum equitibus hora noctis quarta se in castra sua ad Mutinam recepit. Hirtius in ea castra rediit, unde Pansa exierat, ubi duas legiones reliquerat, quæ ab Antonio erant oppugnatæ. Sic partem maiorem suarum copiarum Antonius amisit veterinarum: nec id tamen sine aliqua jactura cohortium prætoriarum nostrarum, et legionis Martiæ fieri potuit. Aquilæ duæ, signa sexaginta sunt relata Antonii. Res benè gesta est: ad XII. Kalend. Maii, ex castris. Vale.

ARGUMENTUM.

Excusat se, quod studium suum erga remp. litteris nondum declaraverit, seque libertatis recuperandæ cupidum ostendit.

C. Asinius Pollio Ciceroni S. D.

Minimè mirum debet tibi videri, nihil me scripsisse de rep. posteaquam itum est ad arma. Nam saltus Castulonensis, qui sempè tenuit nostros tabellarios; etsi nunc frequentioribus latrociniis infestior factus est, tamen nequaquam tanta in mora est, quanta qui in locis omnibus dispositi ab utraque parte scrutantur tabellarios, et retinent. Itaque nisi nave perlatæ litteræ essent, omnino nescirem, quid istic fieret. Nunc vero nactus occasionem, posteaquam navigari cœptum est, cupidissimè, et quam creberrimè potero, scribam ad te. Ne movear ejus sermonibus, quem tametsi nemo est, qui videre velit, tamen nequaquam proin-

dè, ac dignus est, oderunt homines, periculum non est. Adeò est enim inquis mihi, ut nihil non acerbum putem, quod commune cum illo sit. Natura autem mea, et studia trahunt me ad pacis, et libertatis cupiditatem. Itaque illud initium civilis belli sàpè deflevi. Cum verò non liceret mihi nullius partis esse, quia utrobique magnos inimicos habebam; ea castra fugi, in quibus planè turum me ab insidiis inimici sciebam non futurum. Compulsus eò, quòd minimè volebam; ne in extremis essem, planè pericula non dubitantè adii. Cæsarem verò, quòd me in tanta fortuna, modò cognitum, vetustissimorum familiarium loco habuit, dilexi summa cum pietate, et fide. Quæ mea sententia gerere mihi licuit, ità feci, ut optimus quisque maximè probarit: quod jussus sum eo tempore, atquè ita feci, ut appareret, invito imperatum esse. Cujus facti injustissima invidia erudire me potuit, quām jucunda libertas, et quām misera sub dominatione vita esset. Ità, si id agitur, ut rursus in potestate omnia unius sint, qui cumque is est, ei me profiteor inimicum: nec periculum est ullum, quod pro libertate aut refugiam, aut deprecer. Sed consules neque S. C. neque litteris suis præceperant mihi, quid facerem. Unas enim post idus Mart, demùm à Pansa litteras accepi. In quibus hortatur me, ut senatui scribam, me, et exercitum in potestate ejus futurum. Quod, cum Lepidus concionaretur, atquè omnibus scriberet, se consentire cum Antonio, maximè contrarium fuit. Nam quibus commeatibus, invito illo, per illius provinciam legiones ducerem? aut, si cætera transsem, num etiam Alpes poteram trans-

volare, quæ præsidio illius tenentur? Adde huc; quòd perferri litteræ nulla conditione potuerunt. Sexcentis enim locis excutiuntur, deindè etiam retinentur à Lepido tabellarii. Illud me Cordubæ pro concione dixisse, nemo vocabit in dubium, provinciam me nulli, nisi qui à senatu missus venisset, traditurum. Nam de legione trigessima tradenda quantas habuerim contentiones, quid ego scribam? qua tradita, quanto pro repub. infirmior futurus fuerim, quis ignorat? hac enim legione noli acriùs aut pugnatiū quidquam putare esse. Quarè me eum existima esse, qui primùm pacis cupidissimus sim, (omnes enim cives planè studeo esse salvos) deindè qui et me, et tempub. vindicare in libertatem paratus sim. Quòd familiarem meum in tuorum numero habes, opinione tua mihi gratiùs es: invideo illi tamen, quod ambulat, et jocatur tecum. Quæ res, quanti æstimem; si unquam licuerit, vivere in otio, experieris. Nullum enim vestigium abs te discessurus sum. Illud vehementè admiror, non scripsisse te mihi, manendo in provincia ne, an ducendo exercitum in Italiam, reipub. magis satisfacere possim. Ego quidem etsi mihi tutiùs, ac minùs laboriosum est manere; tamen, quia video tali tempore multò magis legionibus opus esse, quām provinciis, quæ præsertim recuperari nullo negotio possunt, constitui, ut nunc est, cum exercitu proficisci. Deinde ex litteris, quas Pansa misi, cognosces omnianam earum tibi exemplar misi, xvii. Kal. April. Cordubæ.

ARGUMENTUM.

Enumerat, quae Balbus, quæstor suus, flagitiore commiserit: quæque ipse fecerit ad exercitum in reip. potestate continendum.

Asinius Pollio Cicer. S. D.

Balbus quæstor, magna numerata pecunia, magno pondere auri, majore argenti coacto de publicis exactionibus, ne stipendio quidem militibus reddito, duxit se à Gadibus; et triduum tempestate retentus ad Calpen, Kal. Jun. trajecit sese in regnum Bogudis, planè benè peculiatus. His rumoribus utrum Gades referatur, an Rōmam, (ad singulos enim nuntios turpissimè consilia mutat) nondū scio. Sed, prætèr furtæ, et rapinas, et virgæ cæsos socios: hæc quoque fecit, ut ipse gloriari solet, eadem, quæ C. Cæsar. Ludit, quos Gadibus fecit, Herennium Gallum histrionom, summo ludorum die annulo aureo donatum in quatuordecim sessum deduxit: tot enim fecerat ordinæ equestris loci. Quatuorviratum sibi prorogavit: comitia biennii bido habuit, hoc est, renuntiavit quos ei visum est: exules reduxit, non horum temporum, sed illorum, quibus à seditionis senatus trucidatus, aut expulsus est, Sex. Varo procos. Illa verò jam ne Cæsaris quidem exemplo, quod ludis prætextam de suo itinere ad L. Lentulum procos, sollicitandum posuit: et quidem, cum ageretur, flevit memoria rerum gestarum commotus. Gladiatoribus autem Fadium quemdam, militem Pompejanum, quia, cum depresso in ludum bis gratis depugnasset, auctore sese no-

lebat, et ad populum confugerat, primùm gallos equites immisit in populum, (conjecti enim sunt lapides in eum, cum arriperetur Fadius) deinde abstractum defodit in ludo, et vivum combusit; cum quidem pransus, nudis pedibus, tunica soluta, manibus ad tergum rejectis, inambularet; et illi misero quiritanti, civis romanus sum, responderet, Abi nunc, populi fidem implora. Bestiis verò cives rom. in his circulatore quendam auctionum, notissimum hominem Hispali, quia deformis erat, objecit. Cum hujusmodi portento res mihi fuit. Sed de illo plura coram. Nunc, quod præstat quid me velitis facere, constituite. Tres legiones firmas habeo: quarum unam vigesimam octavam, cum ad se initio belli accersisset Antonius hac pollicitatione, quo die in castra venisset, denarios quingenos singulis militibus datum, - in victoria verò eadem præmia, quæ suis legionibus: (quorum quis ullum finem, aut modum futurum putavit?) incitatissimam retinui, ægrè meherculè; nec retinuisse, si uno loco habuissem: utpotè cum singulæ quædam cohortes seditionem fecerint. Reliquas quoquæ legiones non destitit litteris, atque infinitis pollicitationibus incitare. Nec verò minus Lepidus ursit me, et suis, et Antonii litteris, ut legionem trigesimam mitterem sibi. Itaque, quem exercitum neque vendere ullis præmiis volui, nec eorum periculorum metu, quæ, victoribus illis portendebantur, diminuere, debetis existimare retentum, et conservatum reip. esse; atquæ ita credere, quocumque imperassetis, facturum fuisse, si, quod jussistis, feci. Nam et provinciam in otio, et exercitum in

mea potestate tenui: finibus meæ provinciæ nusquam excessi: militem non modò legionarium, sed ne auxiliarium quidèm ullum, quoquām misi; et, si quos equites decedentes nactus sum, supplicio affeci. Quarum rerum fructum satis magnum, rep. salva, tulisse me putabo. Sed resp. si me satis novisset, et major pars senatus, majores ex me fructus tulisset. Epistolam, quam Balbo, cum etiam nunc in provincia esset, scripsi, legendam tibi misi. Etiam prætextam, si voles legere, Gallum Cornelium, familiarem meum poscito. vi. id. Jun. Cordubæ. Vale.

ARGUMENTUM.

Deplorat calamitatem reip. quæ Munitensi prælio et consules, et robur, sobolemque militum amiserat.

Asinius Pollio Ciceroni S. D.

Quò tardius certior fierem de præliis apud Mutinam factis, Lepidus effectit, qui meos tabellarios novem dies retinuit: tametsi tantam calamitatem reip. quām tardissimè audire optandum est, sed illis, qui prodesse nihil possunt, neque mederi. Atque utinam eodem S. C. quo Plancum, et Lepidum in Italiam accersistis, me quoquè jusissetis venire. Profecò non accepisset resp. hoc vulnus. Quo si qui lætantur in præsentia, quia videntur et duces, et veterani Cæsaris partium interiisse: tamen postmodùm necesse est doléant, cum vastitatem Italiam respexerint. Nam et robur, et soboles militum interiit: si quidèm, quæ nuntiantur, ulla ex parte vera sunt. Neque ego non videbam, quanto usui reip. essem futurus, si ad Le-

pidum venissem. Omnem enim cunctationem ejus discussissem, præsertim adjutore Planco. Sed scribenti ad me ejusmodi litteras, quas leges, et concessionibus, videlicet, quas Narbone habuisse dicitur, similes, palpare necesse erat, si vellem commeatum, per provinciam ejus iter faciens, habere. Præterea verebar, ne, si antequām ego incœpta perficerem, prælium confectum esset, pium meum consilium raperent in contrariam partem obtrectatores mei, proptèr amicitiam, quæ mihi cum Antonio, non major tamen, quām Plancus, fuit. Itaquè à Gadibus mense Aprili binos tabellarios in duas naves imposui; et tibi, et consulibus, et Octaviano scripsi, ut me facheretis certorem, quonam modo plurimū possem prodesse reip. Sed, ut rationem in eo, quo die prælium Pansa commisit, eodem à Gadibus naves profectæ sunt. Nulla enim post hiemem fuit antè eam diem navigatio, et herculè, longè remotus ab omni suspicione futuri civilis tumultus penitus in Lusitania legiones in hibernis collocaram. Ità porrò festinavit uterque configere, tanquam nihil pejus timerent, quām ne sine maximo reip. detrimento bellum componeretur. Sed, si properandum fuit, nihil non summi ducis consilio gesisse Hirtium video. Nam hæc mihi scribuntur ex Gallia Lepidi, et nuntiantur: Pansæ exercitum concisum esse: Pansam ex vulneribus mortuum: eodem prælio Martiam legionem interiisse, et L. Fabatum, et C. Peduceum, et D. Carfulenum: Hirtiano autem prælio, et quartam legionem, et omnes peræquè Antonii cæsas: item Hirtii quartam, cum castra quoquè Antonii cœpisset, à quinta legione

concisam esse: ibi Hirtium quoquè periisse, et Pontium Aquilam: dici etiam, Octavianum cecidisse: (quæ si, quod dii prohibeant, vera sunt, non mediocriter doleo) Antonium turpitè Mutinæ obsessionem reliquisse, sed habere equitatum, ac legiones sub signis armatas tres, et P. Vagieni unam, inermes benè multos: Ventidium quoquè se cum legione septima, octava, nona conjunxisse: si nihil in Lepido spei sit, descensurum ad extrema, et non modò nations, sed etiā servitia concitaturum: Parmam direptam: L. Antonium Alpes occupasse. Quæ si vera sunt, nemini nostrum cessandum est, neque spectandum, quid decernat senatus. Res enim cogit huic tanto incendio succurrere omnes, qui aut imperium, aut nomen deniqùe populi romani salvum esse volunt. Brutum enim xvii. cohortes, et duas nos frequentes tironum legiones, quas conscriperat Antonius, habere audio. Neque tamen dubito, quin omnes, qui supersint de Hirtii exercitu, confluant ad eum. Nam in delectum non multùm spei puto esse; præsertim cum nihil sit periculosius, quām spatium confirmandi sese Antonio dari. Anni autem tempus libertatem majorem mihi dat: propterea quia frumenta aut in agris, aut in villis sunt. Itaqùe proximis litteris consilium meum expedietur. Nam neque deesse, neque superesse reip. volo. Maximè tamen doleo, adeò et longo, et infesto itinere ad me veniri, ut die quadragesimo post, aut ultrà etiam, quām facta sunt, omnia nuntientur. Vale.

ARGUMENTUM.

Narrat in Antonii adventu, quid egerit, et agit gratias Ciceroni, quod inquis de se rumoribus non crediderit.

M. Lepidus Imp. iterūm, Pont. Max. Cicer. S. D.

Si vales, benè est: ego quoquè valeo. Cum audissem, Antonium cum suis copiis, præmisso L. Antonio cum parte equitatus, in provinciam meam venire; cum exercitu meo à confluente Rhodano castra movi, ac contrà eos venire institui. Itaqùe continuis itineribus ad Forum Vocontium veni, et ultrà castra ad flumen Argentum contrà Antonios feci. P. Ventidius suas legiones tres conjunxit cum eo, et ultrà me castra posuit. Habebat anteā legionem secundam, ex reliquis legionibus magnam multitudinem, sed inermorum. Equitatum habet magnum. Nam omnis ex prælio integer discessit, ità ut sint amplius equitum xxx, millia. Itaqùe ad me complures milites, et equites ab eo transierunt: et in dies singulos ejus copiæ minuuntur. Silanus, et Culeo ab eo discesserunt. Nos, etsi gravitè ab his læsi eramus, quòd contra nostram voluntatem ad Antonium ierant; tamen nostræ humanitatis, et necessitudinis causa, eorum salutis rationem habuimus. Nec tamen eorum opera utimur, neque in castris habemus, neque ulli negotio præfecimus. Quod ad bellum hoc attinet, nec senatui, nec reip. deerimus. Quæ postea egerimus, faciam te certiorem. Etsi omni tempore summa studia officii mutuò inter nos certatim constituerunt pro nostra inter nos familiarit-

tate, et proindè diligenter ab utroque conservata sunt: tamen non dubito, in tanto, et tam repentinō motu reip. quin nonnulla de me falsis rumoribus à meis obtrectatoribus, me indigna, ad te delata sint, quæ tuum animum magnoperè moverent, pro tuo amore in remp. Ea te moderatè accepisse, neque temerè credendum judicasse, à meis procuratoribus certior sum factus: quæ mihi, ut debent, gratissima sunt. Memini autem et illa superiora, quæ abs tua voluntate profecta sunt ad meam dignitatem augendam, et ornandam, quæ perpetuò animo meo fixa manebunt. Abs te, mi Cicero, magnoperè peto, si meam vitam, studium, diligentissimè superioribus temporibus in rep. administranda, quæ Lepido digna sunt, perspecta habes, ut paria, aut eò ampliora reliquo tempore expectes, et proindè tua auctoritatè me tuendum existimes, quò tibi plura tuo merito debeo. Vale. xii. Kalend. Jun. ex castris, ex Ponte Argenteo.


ARGUMENTUM.

Antonii recepti causam confert in milites suos, dissensione civium inique ferentes.

Lepidus Imp. iterum, Pont. Max. S. P. Pl. Q. R. S. D.

Si vos, liberisque vestri valetis, benè est, ego quidem valeo. Deos, hominesque testor, P. C. quamente, et quo animo sempèr in remp. fuerim, et quām nihil antiquius communis salute, ac libertate judicarim; quod vobis brevi probassem, nisi mihi fortuna proprium consilium extorsisset. Nam exercitus cunctus consuetudinem suam in civibus

conservandis, communique pace, seditione facta retinuit: meque tantæ multitudinis civium romanorum salutis, atquè incolumitatis causam suscipere, ut verè dicam, coegit. In qua re ego vos, P. C. oro, atquè obsecro, ut privatis offensionibus omissis, summæ reipub. consulatis, ne misericordiam nostram, exercitusque nostri in civili dissensione sceleris loco ponatis. Quòd si salutis omnium, ac dignitatis rationem habueritis, melius et vobis, et reip. consuleatis. Data iv. Kal. Jun. à Pont. Argenteo. Valete.



M. T. CICERONIS EPISTOLARUM AD BRUTUM, ET ALIOS, LIBER XI.

ARGUMENTUM.

D. Brutus M. Bruto, et C. Casio, quibuscum Cæsarem occiderat, sermonem cum Hirrio habitum exponit, postulatamque à se liberam legationem significat.

D. Brutus M. Bruto, et C. Cassio S. D.

Quo in statu simus, cognoscite. Herivesperi apud me Hirrius fuit: qua mente esset Antonius demonstravit; pessima scilicet, et infidelissima.